

լիցենզավորման գործակալությունը և առողջապահական պետական տեսչությունը, որը վերականգնակերպվել է առողջապահական տեսչական մարմնի /գործել է մինչև 30.06.18թ./ և նրանց կանոնադրություններով վերջիններիս վերապահվել է հետևյալ գործառույթները՝

-համաձայն լիցենզավորման գործակալության կանոնադրության 8-րդ կետի 7-րդ ենթակետի՝ գործակալությունը իրականացնում է լիցենզավորված սուբյեկտների մասին տեղեկությունների հաշվառումը, վերլուծությունը և գնահատումը /ՀՀ կառ. 30.09.10թ. թիվ 1319-Ն որոշում/,

-համաձայն առողջապահական պետական տեսչության կանոնադրության 8-րդ կետի 3-րդ ենթակետի՝ առողջապահության բնագավառում լիցենզավորված անձանց կողմից տվյալ գործունեության իրականացման համար սահմանված պարտադիր պահանջների և պայմանների պահպանման նկատմամբ ստուգումների իրականացումը /ՀՀ կառ. 25.07.13թ. թիվ 857-Ն որոշում/

-համաձայն առողջապահական տեսչական մարմնի կանոնադրության 11-րդ կետի 14-րդ ենթակետի՝ տեսչական մարմինը՝ իր իրավասության սահմաններում իրականացվող վերահսկողության արդյունքում հայտնաբերված «Լիցենզավորման մասին» ՀՀ օրենքով և այլ իրավական ակտերով սահմանված պահանջների և պայմանների խախտումների վերաբերյալ տեղեկությունները տրամադրում է լիցենզավորող մարմիններին /ՀՀ կառ. 27.04.17թ. թիվ 444-Ն որոշում/:

Դեռ ավելին, առողջապահական տեսչական մարմինը 13.12.2017թ.-ին թիվ 4/39761-17 գրությամբ դիմել է ՀՀ առողջապահության նախարարության աշխատակազմին՝ իր կողմից ռիսկի վրա հիմնված ստուգումների մեթոդաբանության՝ ըստ ռիսկայնության տնտեսավարող սուբյեկտների դասակարգում կատարելու նպատակով, խնդրել է տրամադրել տնտեսավարող սուբյեկտների ռիսկի գնահատման չափանիշների հաշվարկման և համապատասխան ստուգումներ իրականացնելու համար անհրաժեշտ տեղեկատվությունը:

Ի պատասխան 13.12.2017թ. թիվ 4/39761 գրության, աշխատակազմը 15.12.2017թ. թիվ ԼՁ/14.2/15590-17 գրությամբ տեսչական մարմնին տրամադրել է լիցենզավորման գործակալության կողմից վարվող լիցենզիաների գրանցամատյանում պահպանվող ամբողջական տեղեկատվությունը՝ տրամադրված լիցենզիաների վերաբերյալ **26.08.2002-04.12.2017թթ.** դրությամբ:

Համաձայն «Լիցենզավորման մասին» ՀՀ օրենքի 20-րդ հոդվածի, գրանցամատյանում ներառվում են լիցենզավորված անձանց անվանումը, գտնվելու վայրը, լիցենզիայի համարը, տրամադրման ամսաթիվը, գրանցման համարը, գործունեության տեսակը, իրականացման վայրը, գործողության ժամկետը տեղեկատվությունները:

Հետևաբար, ՀՀ առողջապահության նախարարության աշխատակազմը լիցենզավորված անձանց վերաբերյալ գրանցամատյանում պահպանվող ամբողջական տեղեկատվության հետ միասին 15.12.2017թ.-ին առողջապահական տեսչական մարմնին կարող էր տրամադրել նաև տեղեկատվություն լիցենզավորված անձանց վերաբերյալ, որոնք մասնագիտական որակավորումը հաստատող փաստաթղթերի պատճենները լիցենզավորող մարմին 01.01.17-15.12.17թթ. դրությամբ չեն ներկայացրել:

#### Գ. Իրականացված լիցենզավորման գործընթացի մասնագիտական որակավորման ստուգման վերաբերյալ

Համաձայն «Լիցենզավորման մասին» ՀՀ օրենքի 43-րդ հոդվածի 2-րդ մասով հաստատված *Լիցենզավորման ենթակա գործունեության տեսակների* աղյուսակի պահանջի, Կազմակերպությունների կամ անհատ ձեռնարկատերերի կողմից բժշկական օգնության և սպասարկման իրականացում գործունեության տեսակի համար սահմանվել է, որ նշված գործունեության տեսակներով զբաղվելու լիցենզիան տալու համար կարող է իրականացվել ֆիզիկական անձանց մասնագիտական որակավորման ստուգում:

Հիմք ընդունելով օրենքի պահանջները, ՀՀ կառավարության 29.02.2002թ թիվ 867-Ն որոշմամբ հաստատված Լիցենզավորման կարգի հավելված 5-ի 6-րդ կետով սահմանվել է, որ *«Բժշկական օգնության և սպասարկման իրականացման դեպքում աշխատանքն իրականացնող համապատասխան մասնագետների գործունեության համար պահանջվում է մասնագիտական որակավորման ստուգում, որն իրականացվում է օրենքով սահմանված կարգով»*: Նշված դրույթը ուժի մեջ է մտել 15.01.2013թ.-ից ՀՀ կառավարության 20.09.2012թ. թիվ 1239-Ն որոշում/:

**ՀՀ Առողջապահության նախարարությունը լիցենզավորման գործընթացներն իրականացրել է՝ չկատարելով «Լիցենզավորման մասին» ՀՀ օրենքի և Լիցենզավորման կարգի մի շարք պահանջներ, որի արդյունքում չեն իրականացրել ֆիզիկական անձանց մասնագիտական որակավորման ստուգումները**

Հարկ է նշել, որ ՀՀ Առողջապահության նախարարությունը 15.01.2013-01.11.2018թթ.. ընթացքում լիցենզավորման գործընթացները իրականացրել է անտեսելով և չկատարելով ՀՀ «Լիցենզավորման մասին» օրենքի 43-րդ հոդվածի 2-րդ կետի /որակավորման պահանջի մասով/, 13-րդ հոդվածի 4-րդ կետի, ինչպես նաև 14-րդ հոդվածի պահանջները՝ մասնավորապես.

*-Ֆիզիկական անձանց որակավորումը ստուգում են համապատասխան լիցենզավորող մարմնի կողմից սրտեղծված որակավորման հանձնաժողովները...*

*-Որակավորման հանձնաժողովների*

*կազմավորման կարգերը և կանոնադրությունները հաստատում են լիցենզավորող մարմինները...*

*-Որակավորման ստուգումը պետք է իրականացվի լիցենզավորման համապատասխան կարգը հաստատելու իրավունք ունեցող մարմնի հաստատած որակավորման կարգին համապատասխան...*

*-Որակավորման կարգերը պետք է կազմվեն մանրամասն, պարզ և չպետք է սահմանեն դրույթներ, որոնք ՀՀ օրենսդրությամբ նախատեսված չեն և այլն:*

Նշված ժամանակաշրջանում ՀՀ ԱՆ-ի կողմից չի կատարվել նաև ՀՀ կառավարության 29.02.2002թ. թիվ 867-Ն որոշմամբ հաստատված Լիցենզավորման կարգի հավելված 5-ի 6-րդ կետի պահանջները:

Այսպիսով, ՀՀ Առողջապահության նախարարությունը 01.01.17-01.11.18թթ. ընթացքում բժշկական օգնության և սպասարկման իրականացում գործունեության տեսակի

լիցենզավորման գործընթացներն իրականացրել է ՀՀ օրենսդրության պահանջները անտեսելով, որի արդյունքում չի իրականացրել Ֆիզիկական անձանց մասնագիտական որակավորման ստուգումները:

Լիցենզավորված /լիցենզավորվող/ անձանց մոտ մասնագիտական պահանջների գնահատման նպատակով լիազոր մարմինը կարող է ստեղծել միասնական տեղեկատվական բազա, որը կներառի լիցենզավորված անձանց մասնագիտական ապահովվածության, Ֆիզիկական անձանց մասնագիտական որակավորման ստուգումների, Ֆիզիկական անձանց շարունակական մասնագիտական զարգացման՝ ՇՄՁ գործընթացների վերաբերյալ տեղեկատվություն՝ հաշվի առնելով, որ համաձայն ՀՀ օրենսդրության պահանջի, 2021 թվականի հունվարի 1-ից ՇՄՁ հավաստագիր չունեցող անձանց չի թույլատրվելու իրականացնել իրենց մասնագիտական գործունեությամբ պայմանավորված աշխատանքային պարտականությունները:

## Դ. Լիցենզավորման հանձնաժողովի գոծունեության վերաբերյալ

Համաձայն «Լիցենզավորման մասին» ՀՀ օրենքի 9-րդ հոդվածի՝ լիցենզավորող մարմինն իր որոշումներն ընդունում է համապատասխան լիցենզավորման հանձնաժողովի եզրակացության հիման վրա:

Նույն օրենքի 40-րդ հոդվածը սահմանում է հանձնաժողովներում հարցերի քննարկման կարգը, մասնավորապես.

- հանձնաժողովները հարցերը քննարկում են իրենց նիստերում, որոնք իրավազոր են, եթե դրանց մասնակցում են հանձնաժողովի անդամների կեսից ավելին,

- հանձնաժողովների որոշումներն ընդունվում են նիստին մասնակցող անդամների ձայների պարզ մեծամասնությամբ՝ փակ գաղտնի քվեարկությամբ:

Օրենքի 8-րդ հոդվածի 4-րդ մասը սահմանում է, որ լիցենզավորող հանձնաժողովների կանոնադրությունները հաստատում են լիցենզավորող մարմինները:

Հիմք ընդունելով նշված պահանջը, ՀՀ առողջապահության նախարարը 15.11.2011թ. թիվ 20-Ն հրամանով հաստատել է ՀՀ առողջապահության նախարարության լիցենզավորման հանձնաժողովի /այսուհետև Հանձնաժողով/ կանոնադրությունը:

Հանձնաժողովի գործունեության համար անհրաժեշտ նյութերի նախապատրաստումը, լիցենզավորման վերաբերյալ կարծիքների հավաքագրումը, ամփոփումը և եզրակացությունները Հանձնաժողովի քննարկմանը ներկայացնում է լիցենզավորման գործակալությունը:

Ուսումնասիրելով 01.01.2017-01.11.2018թթ.. ընթացքում ՀՀ առողջապահության նախարարության կողմից ստեղծված Հանձնաժողովի գոծունեությունը, պետք է նշել, որ գործակալությունը լիցենզավորման համար ներկայացված հայտերի՝ ՀՀ օրենսդրության պահանջներին համապատասխանության վերաբերյալ ուսումնասիրությունների հիման վրա կազմված եզրակացությունները ներկայացնում է Հանձնաժողովի քննարկմանը, և